



АЗАМАТТАРДЫҢ ҚАУІПСІЗДІГІ МАҢЫЗДЫ

Мемлекет басшысы Төтенше жағдайлар министрі Сырым Шәріпхановты қабылдады. Президентке Төтенше жағдайлар министрлігінің атқарып жатқан жұмыстары мен жоспары жөнінде баяндалды.

Мемлекет басшысына министрлікте алдағы уақытта жүзеге асырылатын трансформация және қоғамда қауіпсіздік мәдениетін қалыптастыру жұмыстары туралы мәлімет берілді.

Министрдің айтуынша, төтенше жағдайлардың саны мен ауқымы ұлғайған жағдайда азаматтық қорғаудың мемлекеттік жүйесін төтенше жағдайдың салдарын жоюдан бұрын оның алдын алуға бағдарлау көзделіп отыр.

Сонымен қатар Президентке құтқару бөлімшелерінің материалдық-техникалық базасын жарактандыру және цифрландыру ісін нығайту, сондай-ақ құтқарушылар мен өрт

сөндірушілердің кадрлық әлеуетін арттыру, оларды әлеуметтік қорғау шараларын күшейту жөнінде ақпарат берілді.

Сырым Шәріпханов халықты алдын ала қорғауға қажетті жағдай жасау мақсатында қолданыстағы нормативтік-құқықтық актілерге өзгерістер мен толықтырулар енгізуге айрықша мән беріліп отырғанын айтты.

Кездесу соңында Қасым-Жомарт Тоқаев министрлікке төтенше жағдайлардың санын азайту, сондай-ақ азаматтардың қауіпсіздігін қамтамасыз етуге бағытталған шаралар кешенін жүзеге асыру жөнінде тапсырма берді.

Жанарбек ӘШІМЖАНОВ,
Мәжіліс депутаты:

ҚОҒАМ КҮТКЕН ЗАҢҒА ҚОЛ ҚОЙЫЛДЫ

Кеше Мемлекет басшысы «Заңсыз иемденілген активтерді мемлекетке қайтару туралы» заңға қол қойды. Нормаға сәйкес, қайтару тетіктері ірі сыбайлас жемқорлық субъектілеріне және әкімшілік-билік ресурстары бар адамдармен сыбайлас олигополиялық топтарға қолданылады. Осыған орай, Мәжіліс депутаты Жанарбек Әшімжановтан жаңа заң жайлы сұрадық.

(Жалғасы 4-бетте)



«ЖЕЗКИІК, БІЗДІҢ ЖАҚҚА ҚАЛАЙ КЕЛДІҢ?»



Ежелден киікті киелі санаған халқымыз осынау түз жануарын ерекше қастерлеп, түрлі аңыз-ертегілерге, жыр-дастандарға арқау қылғаны жасырын емес. Кие қонған ақбөкендер де қазақ даласына ерекше бауыр басқан. Сондықтан болар әлемдегі киіктердің 90 пайыздан астамы – қазақ даласында. Қазақстан киіктері әдетте Бетпақдала, Үстірт және Орал популяциясы болып бөлінгенімен, елдегі ақбөкеннің 90 пайыздайы Батыс Қазақстан облысының оңтүстік өңірін мекендейді. Алайда бұл жануар соңғы үш жылдан бері Батыс жұртының «бас ауруына» айналып барады. Осы жылғы соңғы дерек бойынша, киік популяциясы 2 миллионға дейін өскен. Бұл былтырмен салыстырғанда 45,3 пайызға көп. Осы мәселемен айналысатын Батыс Қазақстан облысы ғалымдарының қорытындысы бойынша, Орал өңіріндегі шаруа қожалықтарына және киік популяциясын сақтауға оңтайлы киіктер саны 450-500 мың бастан аспауы керек. Бұл дегеніміз – 2023 жылы 2 млн басқа жететін киік саны ғалымдар көрсеткен саннан 4 есе артық деген сөз.

5 >>

КӨҢІЛ АЙТУ ЖЕДЕЛХАТЫН ЖОЛДАДЫ

Президент Қасым-Жомарт Тоқаев қазақ футболының аңызына айналған данқты спорт ардагері Сейілла Байшақовтың дүниеден өтуіне байланысты оның отбасы мен жақын туыстарына көңіл айту жеделхатын жолдады.

«Сейілла Икрамұлы «Кайрат» футбол командасының сапында көп жылдар бойы өнер көрсетіп, жасындай жарқыраған еді. Білікті бапкер ретінде жастарды жеңіске жетудің қыр-сырына үйретіп, елімізде осы спорт түрінің дамуына зор үлес қосты. Өмірде адал еңбек етіп, өшпес із қалдырған Сейілла Икрамұлының есімі мен бейнесі мәңгі ұмытылмайды. Марқұмның иманы саламат, жаны жәннатта болсын» деп жазылған жеделхатта.

ЖҮК ТАСУШЫЛАР НЕГЕ ЖАБЫРҚАДЫ?



Көлікке жауапты мемлекеттік орган мен отандық жүк тасымалдаушылар арасындағы жанжал өршіп барады. Дау шекараны жүкпен кесіп өту үшін қажетті рұқсаттарды пайдаланбаған жағдайда кері қайтармағаны не бүлдіргені үшін қолмақты айыппұл салу туралы бастаманың айналасында өрбиде. Құзырлы орган бұл қадамға бармасына амалы қалмағанын алға тартады. Ал кәсіпкерлер Үкіметтің бұл шарасы онсыз да титықтаған қазақстандық тасымалдаушыларды тоқырауға ұшырататынын айтады. Тайталастың мәнісі неде?

4 >>

ЛЕГИОНЕР ЛЕГІ ТОЛАСТАМАЙ ТҮР

Қазақ спортына сұранып келген және сырттан келіп қосылған легионерлер легі аз емес. Әсіресе, футбол, хоккей, баскетбол клубтарынан өзге елдің азаматтарын жиі байқаймыз. Олардың айлықтары да миллиондап саналады. Бірақ айды аспанға шығарып, қазақ спортын нәтижеге жеткізіп жүргендері аз. Неге?



Қазір спортқа легионерлерді тарту ешкімге де тансық емес. Себебі шет мемлекеттерден спортшылар шақыру – әлемдік спорт саласында қалыптасқан құбылыс. Дегенмен біздің елімізде легионерлерге көрсетілетін «құрмет» тым жоғары. Осы мәселені бұған дейін Парламент Мәжілісінің бұрынғы депутаты Сәкен Қаныбеков те көтерді. Оның пайымынша, жыл сайын спорт және дене шынықтыру саласындағы уәкілетті орган легио-

нерлерді қысқарту бойынша саясатты жүргізеді. Дегенмен олардың саны қысқартылмайды.

— Барлық спорт түрлерінде бюджеттік шығындарды қайта қараудың уақыты келді. Бұқаралық ақпарат құралдарындағы соңғы жарияланымдарға сүйене отырып, көптеген Еуропа елдері, сондай-ақ Ресей мамандар мен легионерлерден бас тартуды қолдады.

6 >>

ӘЛЕККЕ САЛҒАН АЛИМЕНТ



Өз қанынан жеріп, туған баласын тағдырдың талқысына салып кете беретін ата-аналар көбейді. Ұрпақ алдындағы аманатты аттап, ар-ұятты ұмыт қалдырғандарға қазіргінің заңы да қауқарсыз болып отыр.

АУДАРЫСПАҚТЫ ӘЛЕМ ТАНИДЫ



Алматыда Ат үстіндегі күрес (аударыспақ) федерациясының бірінші дүниежүзілік съезі өтті. Басқосуға Қазақстан, Қырғызстан, Өзбекстан, Моңғолия, Ресей, ҚХР, Венгрия мемлекеттерінің өкілдері қатысты.



